

Gieus olimpics – il suveran duai avair l'ultim pled

Iniziativa parlamentara pretenda il referendum facultativ

DA CLAUDIA CADRUVI / ANR

■ **Il pievel duai pudair decider en l'avegnir davart gieus olimpics en Svizra. Cussegliera naziunala Silva Semadeni inoltrescha en questa sessiun in'iniziativa parlamentara che pretenda il referendum facultativ sche la confederaziun impunda milliardas per tals gieus.** Tant il Grischun sco er il Vallais han ils ultims onns ditg na a gieus olimpics. Na muntass l'introducziun dal referendum sin champ federal betg ch'ins na pudess in summa mai pli manar atras tals gieus en Svizra? «Sch'ins fa ina votaziun ed il pievel di gea, lura han ins ina legitimaziun da manar atras quests gieus», di la cussegliera naziunala a l'anr ed ad RTR.

L'entira Svizra è pertutgada

Per tals gieus stoppia la confederaziun impunder almain ina milliarda francs. I saja pia giustifitgà che betg mo la regiun pertutgada voteschia, mabain er il votant svizzer. «I n'è betg mo in eveniment regiunal, tut il pajais è pertutgà», punctuescha Semadeni. Ella na saja betg categoricamain cunter gieus olimpics. Cun organisar gieus duravels, betg memia



Cussegliera naziunala Silva Semadeni (ps GR) ha intradà in'iniziativa parlamentara per in referendum facultativ per gieus olimpics. MAD

gronds, possia ella s'imaginar ch'ins chatia ina maioritad. Impurtant saja era ch'il comitè olympic surpiglia dapli responsa-

bladad e na surlaschia betg simplamain tut ils ristgs finansials mo als organisateurs.

Gia l'onn passà cura ch'il Vallais planisava gieus olimpics d'enviern aveva Semadeni pretendì en ina moziun ina vota-

ziun dal pievel svizzer. Betg mo pervi da la milliarda che la confederaziun vuleva contribuir, mabain era perquai che la polizia da quasi mintga chantun fiss stada involvida. La moziun è vegnida cumbattida cun l'argument: Ins na possia betg simplamain midar las reglas amez il gieu.

Perquai vul Semadeni uss – avant ch'in auter chantun planisescha puspè gieus olimpics – procurar ch'il referendum facultativ vegn scrit en la lescha.

Na pertutga betg la cuppa mundiala

La lescha per la promoziun da sport preveda che la confederaziun dastga sustegnair eveniments da sport internaziunals sch'ils chantuns sa participeschan era vi dals custs. La confederaziun po era promover e coordinar tals gieus. L'iniziativa parlamentara da Semadeni pretenda uss dad agiuntar a questa disposiziun: «Il sustegnim da gieus olimpics entras la confederaziun è suttemess al referendum facultativ.» Per occurrenz sco la cuppa mundiala che na custan per lunsch ora mai tant sco gieus olimpics na duvrassi pia nagina votaziun.

Davart l'iniziativa parlamentara decidan directamain las duas chombras federalas e lur cumissiums. Il cussegl federal na vegn betg consultà.